

20 AUG 2000

PEMUDA UMNO ANJUR MAJLIS KESYUKURAN SEMPENA HARI KEMERDEKAAN

KUALA LUMPUR, 20 Ogos (Bernama) -- Pergerakan Pemuda UMNO akan menganjurkan satu program agama yang dikenali "Mensyukuri Nikmat Kemerdekaan" bagi menyuntik semangat dan kesedaran warga Pemuda mengenai nilai serta harga sebuah kemerdekaan pada 30 Ogos ini.

Ketuanya, Datuk Hishammuddin Hussein hari ini berkata program itu yang diadakan sempena sambutan Hari Kemerdekaan ke-43 akan turut mengadakan majlis dialog dengan Perdana Menteri Datuk Seri Dr Mahathir Mohamad selaku Presiden Umno.

"Yang lebih utama ialah betapa pentingnya mengisi kemerdekaan dengan menjaga keamanan dan kesejahteraan yang telah sama-sama dikecapi sejak negara merdeka lagi," katanya dalam satu kenyataan di sini.

Katanya, diharapkan majlis itu dapat menanam rasa syukur nikmat kemerdekaan dan menyemai sikap tanggungjawab untuk mempertahankan kedaulatan dan kemerdekaan Malaysia.

Program itu akan diadakan di Masjid Putra bermula pukul 3.30 petang dan dijangka dihadiri lebih 5,000 anggota Pergerakan Pemuda Umno termasuk ahli dan barisan Exco dari seluruh negara.

-- BERNAMA

CS ARA AKD